

Per i joegn l'é ruà ence l libret

La Risola à metù fora na publicazion che tol ite duc i projec a la leta di joegn e de sia families

Sozièl - La Risola no lascia mai sù de se dèr da fèr. Chisc dis passé l'é vegnù fora l libret che tol ite duc i projec porté dant dal Pian di joegn de zona per l'an 2010.

Chi che mai aessa l met de l veder l se n tole nà copia, per sé o per si fies. I se lo vèrde fora ajache la scomenzadives portèdes dant da la Risola les é dassen gustegoles, educatives e per duc i guscé e besegnes.

L Pian di joegn te Val de Fascia l'é ruà a sia seconda edizion e de gra al lurier de si responsàboi e soraldut di joegn de Fascia, la Risola se à vadagnà la nomina de Pian più joen del Trentin ajache l desch de lurier te sia composizion l'à tout ite ence joegn de 20 e 22 egn.

Se à fat ence n gran vèrech inant e dassen emportant. L Pian di joegn de Fascia no demò é stat bon de trèr ite la partezipazion di joegn te la desvaliva scomenzadives ma amò de più chest an i joegn moscia so empegn ence en cont a l'organizacion di singoi corsc metui a la leta. Ogne

sàbeda, aló dal portel te Comprenjorie ladin, l'é i joegn che se met a la leta per tor dant la domanes de chi che vel se ensinuèr ai desvalives projec.

Chisc dis l liber de la Risola, de gra al didament de la Sorastanza, l

vegnarà portà fora te duta la scola mesènes e autes de Fascia, dapò l vegnarà portà fora ti Comuns, te la biblioteches e ben segur i librec i é a la leta per duc aló dal Comprenjorie. L libret l'é ence na ocajon per reingrazièr duc chi che à tout pèr

al desch de lurier e ence i desvalives sponsor e sostegnidores che ge à sport so sostegn ai joegn de Fascia. I projec proponec da la Risola i é 13. Vèlch un l se à ence jà serà sù con la fin de la sajón da d'invern ma etres, de gran enteress, tacarà ite ades o via per l'istà. Per a e r m a o r informaziòns se pel ence jir tel sit www.larisola.com. (vr)



La soracuerta del libret de La Risola 2010.